

Madaraja ya Filamu na Michezo ya Kuigiza

- Daraja "U" au "WW" - Inaruhusiwa kutazamwa na watu wote,
 - Daraja "13" - Inaruhusiwa kwa watazamaji kuanzia umri wa miaka 13 na kuendelea,
 - Daraja "16" - Inaruhusiwa kwa watazamaji kuanzia umri wa miaka 16 na kuendelea,
 - Daraja "18" - Inaruhusiwa kwa watazamaji kuanzia umri wa miaka 18 nakuendelea,
 - Daraja "KK" au "R" - Filamu iliyokataliwa kibali cha maonesho pamoja na kuimiliki filamu husika. Hairuhusiwi kuoneshwa mahali popote Tanzania,
 - Daraja "SE" au "MM" - Filamu kwa ajili ya maonyesho maalumu ya kielimu, Kimafunzo, dini n.k.
- "PG" au "Muongozo wa Mzazi au Mlezi" - Inaruhusiwa kuonwa na watu wote isipokuwa itahitaji muongozo na usimamizi wa mzazi au mlezi kwa watoto,
- VL - Tahadhari ya uwepo wa matukio ya kutisha na lugha kali,
- Daraja "X" Hairuhusiwi kuoneshwa popote na wakati wowote nchini Tanzania.

Muhimu: Zingatia madaraja tajwa wakati wa kununua, kuuza, kuonyesha au kusambaza picha jongevu na michezo ya kuigiza kuititia mfumo wowote.

Alama ya Uhakiki



Alama hii huonesha daraja liliopangwa na Bodi ya Filamu kwa filamu husika. Hutakiwa kubandikwa mbele na nyuma ya kasha la filamu hiyo pamoja na kuoneshwa kabla ya filamu kuanza.

Mambo Yasiyotakiwa Kuoneshwa Kwenye Picha Jongevu na Mchezo wa Kuigiza

Mambo hayo ni pamoja na;

- Ngono au tendo la kujamiihana ambapo viungo vya siri vitaoneshwa dhahiri kwa watazamaji,
- Ngono au kujamiihana kinyume cha maumbile au kati ya binadamu na wanyama,
- Ikiwa lengo ni kuoneshesa utupu au sehemu za siri za binadamu kwa lengo la udhalilishaji wa utu,
- Ikiwa uchezaji au miondonko ya mwili wa mshiriki unalenga kuwashawishi watazamaji kupata/kujenga taswira/hisia za ngono au kujamiihana,
- Ikiwa lengo kuu ni kushawishi au kuonyesha vitendo vinavyoashiria ushoga au usagaji,

- Ikiwa lengo kuu ni kufundisha au kuwashawishi watazamaji kushiriki, kujifunza au kutenda uhalifu pamoja na mbinu za kuukwepa mkono wa Sheria,
- Ikiwa lengo ni kushawishi, kutukuza au kuhudhurisha matumizi ya lugha isiyokuwa na staha,
- Ikiwa lengo ni ushawishi au uchochezi unaosababisha kuvuruga au kuvunja uhusiano na ushirikiano kati ya Tanzania na nchi za nje,
- Ikiwa lengo ni kuzua kashfa kwa mtu yeoyote, taasisi au asasi yoyote ndani na nje ya nchi,
- Ikiwa lengo ni kushawishi au kuonyesha unyama, ukatili, unyanjasaji au utesaji wa binadamu, jinsi, jinsia na wanyama,
- Ikiwa lengo kuu ni kuonyesha, kushawishi, kutukuza au kuhalilisha uvaaji wa mavazi au maleba usio wa staha,
- Ikiwa lengo ni kuonyesha, kushawishi, kutukuza au kuhalilisha ulevi wa aina yoyote.

Tangaza Tanzania Kupitia Picha Jongevu na Michezo ya Kuigiza

Tanzania imejaliwa kuwa na mandhari bora na adhimu ambayo inaweza kutumiwa katika uchukua ji wa picha za filamu, makala za filamu, matangazo, michezo ya kuigiza, michezo ya radio na televisheni. Mandhari hayo ni pamoja na uoto wa kijani kibichi, vivutio vya kiutamaduni na kitalii, Mlima Kilimanjaro pamoja na milima mingine, maeneo ya tambarare, wanyama pori, ndege, maeneo ya kihistoria na mandhari nyingine kama hizo. Aidha, Tanzania pia imejaliwa kuwa na urithi adhimu wa utamaduni na kihistoria ambao unaweza kutumika kama maudhui ya picha jongevu na michezo ya kuigiza. Hii ni pamoja na mavazi, lugha hususan Kiswahili na vifaa vya kiutamaduni.

Wadau wote wa filamu wanaaswa kutumia mandhari hizi za kitanzania ili kuimarisha ubora wa kazi zao na kuitangaza Tanzania.

Mlima Kilimanjaro pamoja na Mandhari nyingine



Katibu Mtendaji,
Bodi ya Filamu Tanzania,
S. L. P. 79241,

8 Barabara ya Kivukoni, Utumishi Kitalu H,
Simu: +255 22 2121920
es@filmboard.go.tz

Mfumo: sanaa.go.tz



BODI YA FILAMU TANZANIA



Waziri wa Utamaduni, Sanaa na Michezo Mhe. Balozi Pindi Chana (Mb) akishuhudia utaja sahihi wa Makubaliano ya Ushirikiano (M.O.U) kati ya Serikali ya Tanzania kuititia Bodi ya Filamu Tanzania (TFB) na Serikali ya Korea Kusini kuititia Asasi ya Mashirikiano Kimataifa (BFIC). Katibu Mtendaji wa TFB Dkt. Kiagho Kilonzo aliiwakilisha Serikali ya Tanzania wakati Naibu Katibu Mkuu wa BFIC Ndg. Chi Woo Lee aliiwakilisha Korea Kusini.

Bodi ya Filamu Tanzania

Bodi ya Filamu ni Taasisi ya Serikali iliyoundwa kwa Sheria ya Filamu na Michezo ya Kuigiza Na. 4 ya mwaka 1976 ikisomwa na marekebisho yake ya mwaka 2019 pamoja na Kanuni zake za Mwaka 2020

Dira

Kuifanya Tanzania kuwa kitovu cha ubora duniani katika masuala ya filamu na televisheni.

Dhima

Kuitangaza Tanzania kama eneo bora la upigaji picha za filamu kwa ajili ya uchumi endelevu na kutengeneza ajira.

Lengo Kuu

Kuwa na Tasnia ya Filamu yenye tija.

Majukumu ya Bodi ya Filamu Tanzania ni pamoja na;

- Kuishauri Serikali kuhusu masuala ya filamu na michezo ya kuigiza, pamoja na kusimamia na kuratibu maendeleo ya Sekta ya Filamu,
- Kusimamia na kuratibu utayarishaji wa filamu na michezo ya kuigiza,
- Kuhakiki filamu na michezo ya kuigiza, kuzipangia madaraja na kuzitolea vibali, pamoja na kusimamia usambazaji wa filamu na uoneshaji wa michezo ya kuigiza,
- Kuandaa, kuratibu na kuendesha warsha, vikao, mijadala na mafunzo ya kujenga weledi kwa wadau, tuzo na matamasha.

VIBALI NA ITHIBATI KATIKA SEKTA YA FILAMU

Vibali vya Utayarishaji wa Filamu na Michezo ya Kuigiza kwa Watayarishaji Watanzania.

Kampuni, taasisi au watu binafsi wa Kitanzania wanaotaka kurekodi picha jongevu kwa ajili ya kutayarisha filamu, makala za filamu, vipindi vya televisheni, matangazo na picha jongevu nyingine.

Taratibu za Kupata Kibali

Kujaza fomu ya maombi inayopatikan katika tovuti ya Bodi ya Filamu na itaambatanishwa na nyaraka mbalimbali zilizoambatishwa katika sehemu E ya fomu ya maombi, au kwa kujaza taarifa za ombi husika kupitia mfumo wa Artist Management Information System (AMIS) kupitia tovuti ya <https://sanaa.go.tz>, Mhusika kuwasilisha ombi Bodi ya Filamu Tanzania, Ombi kufanyiwa kazi na kutolewa mrejesho, Mhusika kulipia ada ya kibali, na Kibali kutolewa.

Ada: Ada ya kibali italipwa kwa mujibu wa jedwali la Tatu la Kanuni za Sheria ya Filamu na Michezo ya Kuigiza za Tangazo Na. 488 la mwaka 2020, kupitia kumbukumbu namba ya malipo (control number) itakayotolewa baada ya ombi kupokelewa na kupitiwa.

Vibali vya utayarishaji wa filamu na michezo ya kuigiza kwa waombaji kutoka nje ya nchi;

Kampuni, taasisi na watu binafsi kutoka nje ya nchi wenye lengo la kurekodi picha jongevu kwa ajili ya utayarishaji wa filamu, vipindi vya televisheni, matangazo na picha jongevu nyingine zozote.

Taratibu za Kupata Kibali

- Kujaza fomu ya maombi ambayo itaambatishwa na; barua ya kueleza nia ya kurekodi picha husika, maeleo mafupi kuhusu kazi husika (synopsis)/mswada (script)/story board, nakala za hati za kusafiria za kundi lote la wataalamu, orodha ya vifaa vya filamu watakavyoingia navyo nchini kwa ajili ya kazi hiyo, uthibitisho wa hati ya malipo, maoni ya Ubalizi wa Tanzania uliopo karibu na anakotoka mwombaji (Sehemu ya VI ya fomu),
- Kuwasilisha ombi Bodi na kufanyiwa kazi na Mrejesho kutolewa.

Ada: Dola za Kimarekani (USD) 1000 (kawaida), dola 3000 (haraka).

Muhimu: Kulingana na maudhui ya ombi, muombaji (mtanzania au kutoka nje ya nchi) anaweza kuhitajika kuwasilisha nyaraka zaidi.

ITHIBATI ZA UENDESHAJI WA SHUGHULI ZA FILAMU

Leseni za Uendeshaji

Wahusika

Wadau wote wanaojishughulisha na shughuli zozote za filamu na michezo ya kuigiza, matangazo, utayarishaji wa picha jongevu zozote, miundombinu, studio, matamasha na tuzo za filamu.

Taratibu za Kupata Leseni

- Mwombaji anapaswa kuchukua/kupatiwa na kujaza fomu ya maombi,
- Mwombaji ataiwasilisha ikiwa na viambatisho vilivyoainishwa kwenye fomu husika pamoja na uthibitisho wa hati ya malipo stahiki,
- Fomu itahakikiwa na Bodi ya Filamu, Kwa maeneo au miundombinu ya kufanyia shughuli za filamu na michezo ya kuigiza, utafanyika ukaguzi wa eneo/miundombinu husika ili kuhakikisha limekidhi vigezo stahiki, Mhusika kupewa leseni husika endapo ombi likiridhiwa. Leseni itatakiwa kuhuishwa kila mwaka.

Ada: Sh. 500,000/= kwa kampuni kubwa zenye zaidi ya iaka minne (4) na kuendelea au Sh. 200,000 kwa Kampuni zenye umri wa miaka 2 na kuendelea au Sh. 36,000 kwa Kampuni ndogo zenye chini ya miaka miwili.(2) kwa mwaka (tozo halisi kubainika baada ya uhakiki na ukaguzi wa taarifa za muombaji na/au miundombinu)

ITHIBATI NA VITAMBULISHO

Wahusika

Wadau wote, yaani kila mmoja anaejishughulisha na shughuli zozote za filamu, michezo ya kuigiza. matangazo, biashara ya filamu, utayarishaji, uigizaji uongozaji, utafutaji mandhari na shughuli nyingine kama hizo.

Taratibu za Kupata Ithibati na Kitambulisho

Kujaza fomu ya maombi ya vitambulisho, Kuwasilisha fomu ikiwa na viambatisho vilivyoainishwa kwenye fomu pamoja na uthibitisho wa hati ya malipo, Taarifa za muombaji zitahakikiwa na Bodi ya Filamu, Kitambulisho husika kitatolewa. Kitambulisho kitatakiwa kuhuishwa kila mwaka.

Ada: Kila kitambulisho ni Sh. 30,000/= kwa miaka mitatu (3)

Uhakiki wa Picha Jongevu na Michezo ya Kuigiza

Mdau ye yeyote anayetengeneza, kusambaza au kuonesha filamu yoyote au mchezo wa kuigiza au kuingiza kazi hizo hapa nchini kutoka nje ya nchi, anatakiwa kuziwasilisha Bodi ya Filamu kwa uhakiki, kuzipangia madaraja na kuzitolea vibali kabla ya kuzisambaza au kuzionesha kupitia mfumo wowote.

Taratibu za Uhakiki

Kujaza fomu ya maombi, Kuwasilisha fomu hiyo Bodi pamoja na nakala mbili za filamu husika na nakala mbili za matangazo (mabango) yake. Aidha, ataambatisha vibali vya kutumia maeneo/vifaa/maleba maalumu.

Ada:

- Filamu iliyotayarishwa nchini na watanzania (waigizaji watanzania tu) ni Sh. 60,000/= kwa saa (kawaida). Sh. 100,000/= kwa saa (haraka),
- Filamu iliyotayarishwa nchini na watanzania (waigizaji mchanganyiko wa watanzania na wageni) ni sh. 70,000/= kwa saa (kawaida), na Sh. 120,000/= kwa saa (uhakiki wa haraka),
- Mchezo wa kuigiza uliotayarishwa nchini na watanzania (waigizaji watanzania tu) Sh. 30,000/= kwa saa (kawaida), na Sh. 50,000/= kwa saa (uhakiki wa haraka),
- Mchezo wa kuigiza uliotayarishwa nchini na watanzania (waigizaji mchanganyiko wa watanzania na wageni) Sh. 50,000/= kwa saa (kawaida), na Sh. 60,000/= kwa saa (haraka),
- Filamu inayotoka nje ya nchi ni Dola (USD) 50 kwa sasa,
- Filamu iliyotayarishwa na raia wa kigeni (waigizaji mchanganyiko wa watanzania na wageni) Dola (USD) 40 kwa sasa,
- Uhakiki wa matangazo (mabango) ya filamu/michezo ya kuigiza ya kitanzania ni Sh. 5,000/= na Dola 5 kwa filamu/michezo ya kuigiza ya kigeni kwa kila mita ya mraba ya tangazo.

Muhimu: Malipo yote yatafanyika kwa kutumia namba ya malipo (control number) inayotolewa na Bodi ya Filamu